

TASK FORCE LEH MIPUITE:

COVID-19 hripui lengin khawvel pumah harsatna a thlen tak avangin Mizoram sorkar chuan hrileng laka kan him theihna turin a hmalakte zingah State Level Task Force on Mitigation of Coronavirus (COVID-19) a din a. Hei hian Local Council leh Village Council tinah Local Level Task Force (LLTF) leh Village Level Task Force (VLTF) a din nghal bawk a. Hrileng mek laka mipuite kan himna tura **Inchhungkhung (Total Lockdown) leh Curfew** hial te puan a nih hnuah phei chuan anni hi Sorkar leh mipuite inkara kan aiawha engkim buaipuitu an ni ta berin a lang.

Local/Village Task Force (Task Force tiin sawi zui tawh mai ila) te hi Khawtlang hruaitute leh Tlawmngai Pawl hrang hrang leh Kohhran hruaitu aṭangtea ruat an ni hlawm a. Mahni leh chhungkaw sahimna pawh ngaihtuah hlei thei lovin, **mahni khua/veng theuhah sorkar thuchhuah lo kenkawhpui leh mipuite harsatna lo sutkianpui chu an hna pui ber a ni ta a ni**. He hrileng laka kan chhungkua, kan Veng/khua leh kan ram pumpui a him theih nan chhun leh zanah rim takin an thawk a. Mipuiin an thu kan awih a ngai a, **Task Force te pawhin Sorkar leh mipui inkara ding an ni tih an inhriat a pawimawh**.

Mipui nawlpuiin thu kan awih tha rih hle a, mi tlem te thu awih lote avangin Task Force te hna hi a hautak phah hle ṭhin a ni. Tunah hian hun eng emaw chhung kan inkhung ta hlawm a. **Chhuanchham mai tur te, ei leh bara harsate chhui chhuaka chhawmdawl na hna thawkin Task Force te hian beihpui an thlak mek a**. Hemi kawngah hian kan bengvarpui pawh an mamawh hle. Mahni awmna hnaivaia ṭanpui ngaite kan lo dap chhuahpui bakah mi dang tana malsawmna nih tum theuh ila. A neinung deuh ten a nei lote chhawmdawlin Mizo kan nihna leh Kristian kan nihna i lan chhuahfir zel ang u.

Tunah hian Task Force te hmalknain tlawmngai tura an sawm chhuah (volunteer) ten thlai thar (chawhmeh) leh sa thlengin a mamawhte hnenah an sem kual a ṭhin a, a lawmawm hle. Task Force te hian ṭul bik thil tak tak chu an la ngaihtuah chho zel turah ngai ila, **kan mamawh ang apiang min rawn pe zel tura beisei chi erawh an ni lo vang**.

Kan mamawh min rawn phuhruk saktute hi hrileng pudarhtu an ni thei a, keimahni tan vek pawh a him lo hle a ni tih hria ila. Tin, tuna kan in chhung theuha thil awm bak, pawn lam thil lakluh belh nasat hi a him lo hle a ni tih kan hriat tlan pawh a tha awm e. Ei tur/bar tur kan lungkhamna lamah fimkhurna tur pawimawh em em, inhnim hnaih loh/mi dang nena inpawh tawnna daidan (social & physical distancing) hi kan ngaihthah palh ang tih a hlauhawm em em a ni.

Mipuite mamawh phuhruk a ngaih miau avangin Task Force te hi pawn chhuak lo thei lovin an hmanhlel a. In lama tawmim (stay home) leh midang nena inhnimhnaih loh (social distancing) hi an zawm ve thei ta lo a ni. Vanduaithlak takin **he hrileng hi lo darkh punlun ta zel se, anmahni leh an chhungte hi a kai hmasa ber tur zinga mi an ni** tih kan hriatpui pawh a tha.

Kan ni tin khawsaknaa mamawh tak tak thil (essential commodities) hi chu Sorkar pawhin a ngaihtuah zel ang. Mipui lam hian kan mamawh kan tihtlem ve telh telh a ngai ta a ni. Tunah hian khawvel pumah thil siamchhuahna hmunpui (Industries leh Factories) an chawl thuap tawh a, a awmsa hian a daih rei dawn lo. Tuna a awmsa ei leh in thilte pawh hi chhiat hun (expiry) nei vek an ni a, awm reng mah se hmantlak loh hun an nei dawn. Kan khawsak dan phung pangngai renga khawsak reng kan tum chuan harsatna tak tak a lo thlen hunah kan buai ang. **Chuvangin tun aṭang hian inrenchem, a samkhai thei ang bera khawsak leh mahni intodelh i zir ṭan ang u.**

Tunah hian Task Force te tan pawh thurel tura inkoh khawm te hi a remchang tawh lo va. Social media hmanga inrawn tawn te a ngai, thu tlukna felfai tak han siam mai te hi a awlai tawh lo em em a. An dinhmun hi i hriatthiampui ang u. **Intihfin a hun lo va, Ngawhngawl chhuah a hun lo va, Thuawih Hun a ni.** Kan invenna hmanraw neih chhun, theih ang tawka intihfai, kut sil ngun leh punkhawm pumpelh (social distancing) leh mi dang nena inhnaiah loh (physical distancing) hi i ngai pawimawh zel ang u.

Kan Local Task Force te hian an ngaihtuahna an seng nasa a, an thawk rim hle bawk. Chutiang tih theihna (power) an nei em ni?, chuti khati.... inti mai lovin, thuawih takin i thlawp phawt mai ang u. **Tin, Task Force te pawhin an Thuneihna lekkawh aiin mipui rawngbawltu an nihna dah hmasa thei zel sela a duhawm.** Mipuite rin ngama hna an thawh a, kan thlawpa kan thawhpui that phawt chuan anmahni kan chhawk zangkhai tihna a ni ang a, an tan hnathawh a phurawm sauh ang a, kan tan a a tha bawk ang.

NANGMAH KHA HIM LA, MI DANG HIMNA TUR NGAIHTUAH VE RAWH LE.